

四庫全書

子部

欽定四庫全書

子部

法苑珠林卷一百十二

詳校官中書臣沈鳳輝

檢討臣何思鈞覆勘

總校官檢討臣何思鈞

校對官中書臣程琰

謄錄監生臣湯汝梅

欽定四庫全書

法苑珠林卷一百十二

唐 釋道世 撰

酒肉篇第九十三之一

述意部

夫酒為放逸之門大聖知其苦本所以遠酣肆離酒緣  
棄醉朋近法友出昏門入醒境肉是斷大慈之種大聖  
知其殺因所以去腥臊淨身口噉蔬菜澄心神招慈善

感延年故俗書禮記云見其生不忍見其死聞其聲不忍食其肉斯亦不殺之義也若使噉食酒肉之者即同畜生豺狼禽獸亦即具殺一切眷屬食噉諸親反讎怨報歷劫長夜無有窮已如經論說有一女人五百世害狼兒狼兒亦五百世害其子又有女人五百世斷鬼命根鬼亦五百世斷其命根故知經歷六道備受怨報或經為師長或是父母或是兄弟或是姊妹或是兒孫或是朋友今是凡身各無道眼不能分別還相噉食不自

覺知噉食之時此物有靈即生瞋恨還成怨讎向到至親反變成怨如是之事豈可不思暫爭舌端一時少味永與慈親長為怨對可為痛心難以言說是故涅槃經云一切肉者悉斷及自死者自死猶斷何況不自死者又楞伽經云為利殺衆生以財網諸肉二業俱不善死墮叫呼獄何謂以財網肉陸設置罟水設網罟此是以網網肉若於屠殺人間以錢買肉此是以財網肉若令此人不以財網肉者習惡律儀捕肉衆生此人為當專

自供口亦復別有所擬若別有所擬向食肉者豈無殺分何得云我不殺生此是灼然違背經文斷大慈種障不見佛也

飲酒部

述曰此之一教有權有實權則漸誘之訓以輕脫重初開無犯據其障理非無其過若約實教輕重俱禁始末不犯是名持戒初據權說者故未曾有經云爾時國王太子名曰祇陀聞佛所說十善道法果報無窮長疏义

手白佛言佛昔令我受持五戒今欲還捨所以者何五戒  
法中酒戒難持畏得罪故世尊告曰汝飲酒時為何惡耶  
祇陀白佛國中豪強時時相率賫持酒食共相娛樂以致  
歡樂自無惡也何以故得酒念戒無放逸故是故飲酒不  
行惡也佛言善哉善哉祇陀汝今已得智慧方便若世間  
人能如汝者終身飲酒有何惡哉如是行者乃應生福無  
有罪也若人飲酒不起惡業歡喜心故不起煩惱善心因  
緣受善果報如是五戒何有失乎飲酒念戒益增其福先

持五戒今受十善功德倍勝十善報也時波斯匿王白佛  
言世尊如佛所說心歡喜時不起惡業名有漏善者是事  
不然何以故人飲酒時心則歡喜歡喜心故不起煩惱無  
煩惱故不行惱害不害物故三業清淨清淨之道即無漏  
業世尊憶念我昔遊行獵戲忘將厨宰於深山中覺飢欲  
食左右答言王朝去時不被命勅令將厨宰即時無食我  
聞是語已走馬還宮教令索食王家厨監名脩迦羅脩迦  
羅言即無現食今方當作我時飢逼念不思惟勅臣斬殺



厨監臣被王教即共議言簡括國中唯此一人忠良直  
事今若殺者更無有能為王監厨稱王意者時末利夫  
人聞王教勅殺脩迦羅情甚愛惜知王飢乏即令辦具  
好肉美酒沐浴名香莊嚴身體將諸妓女往至我所我  
見夫人裝束嚴麗將從妓女好酒肉來瞋心即歇何以  
故末利夫人持五戒斷酒不飲我心常恨今日忽然將  
酒肉來共相娛樂展釋情故即與夫人飲酒食肉作衆  
妓樂觀喜娛樂恚心即滅夫人知我忘失怒意即遣黃

門輒傳我命令諸外臣莫殺厨監即奉教旨我至明旦  
深自悔責愁憂不食顏色顛顛夫人問我何故憂愁為  
何患耶我言吾因昨日為飢火所逼瞋恚心故殺脩迦  
羅自計國中更無有人堪監我厨如脩迦羅者為是之  
故悔恨愁耳夫人笑曰其人猶在願王莫愁我重問曰  
為實如是為戲言耶答言實在非戲言也我令左右喚  
厨監來使者往召須臾將來我大歡喜憂悔即除王白  
佛言末利夫人持佛五戒月行六齋一日之中終身五

戒已犯飲酒妄語二戒八齋戒中頓犯六戒此事云何  
所犯戒罪輕耶重耶世尊答曰如此犯戒得大功德無  
有罪也何以故為利益故如我前說夫人修善凡有二  
種一有漏善二無漏善末利夫人所犯戒者入有漏善  
不犯戒者名無漏善依語議者破戒修善名有漏善依  
義語者凡心所起善皆無漏業王白佛言如世尊說末  
利夫人飲酒破戒不起惡心而有功德無罪報者一切  
人民亦復皆然何以故我念近昔舍衛城中有諸豪族

利利王公因小諍競乃致大怨各各結謀興兵相伐兩家並是國親非可執錄紛紜鬪戰不從理諫深為憂之復自念言昔太子時共大臣提韋羅相忿情實不分意欲誅滅因太后與酒飲已情和思惟是已即勅忠臣令辦好酒及諸甘饌又使宣令國中豪族羣臣士民悉皆令集欲有所論國中大事諸臣諍競兩徒眷屬各有五百應召來集於王殿上莊嚴大樂王勅忠臣辦瑠璃椀椀受三升諸寶椀中盛滿好酒我於衆前先罄一椀王

曰今論國事想無異心今當人人辦此一挽甘露良藥  
然後論事咸言唯諾作唱大樂諸人得酒并聞音樂心  
中歡樂亡失讎恨因酒息諍而得太平此豈非是酒之  
功也竊見世間窮貧小人奴客婢使夷蠻之人或因節  
日或於酒店聚會飲酒歡樂心故不須人教各各起僂  
未得酒時都無是事是故當知人因飲酒則致歡樂心  
歡樂時不起惡念不起惡念則是善心善心因緣應受  
善報獼猴得酒尚能起舞況於世人如世尊說施善善

報施惡惡報末利夫人皆由前身以好施人故今得好報世尊云何令持五戒月行六齋六齋之日不得莊嚴香華服飾作倡妓樂又復不聽附近夫壻愛好之姿竟何所施徒云其功豈非苦也佛告王曰大王所難非不如是末利夫人在年少時若我不勅令受戒法修智慧者云何當有今日之德以能得度復度王身如斯之功復歸誰也

述曰此第二約其實說輕重不犯真名持戒故大聖知

時量機通塞通則開禁隨時量前損益如匿王殺厨監  
太子欲殺其父此並因酒忘忿得全身命免其大罪以  
輕脫重不受累殃然非無飲酒之咎來報之罪不得見  
有前開遂即雷同總犯各須量其教意復省己身行德  
優劣得預聖人斯匿末利開禁以既不同此即須依經  
纖毫勿犯最為殊勝故四分律云是我弟子者乃不以  
草頭滴酒入口何況多飲是故咽咽結提又成論問云  
飲酒是實罪耶答曰非也所以者何飲酒不為惱衆生

故而是罪因若人飲酒則開不善門以能障定及諸善法如殖衆果必有牆障故知酒過如果無園又優婆塞經云若復有人樂飲酒者是人現世喜失財物身心多病常樂鬪諍惡名遠聞喪失智慧心無慚愧得惡色力常為一切之所呵責人不樂見不能修善是名飲酒現世惡報捨此身已處在地獄受飢渴等無量苦惱是名後世惡業之果若得人身心常狂亂不能繫念思惟善法是一惡因緣力故令一切外物資生悉皆具爛又長



阿舍經云其飲酒者有六種失一者失財二者生病三者鬪爭四者惡名流布五者恚怒暴生六者智慧日損又智度論飲酒有三十五失如前受戒篇說又沙彌尼戒經云不得飲酒不得嗜酒不得嘗酒酒有三十六失失道破家危身喪命皆悉由之牽東引西持南著北不能諷經不敬三尊輕易師友不孝父母心閉意塞世世愚癡不值大道其心無識故不飲酒欲離五陰五欲五盖得五神通得度五道故不飲酒又薩遮尼乾子經偈

云

飲酒多放逸 現世常愚癡 忘失一切事

常被智者呵 來世常闇鈍 多失諸功德

是故黠慧人 離諸飲酒失

又十住婆沙論問曰若有人捨施酒未知得罪以不答  
曰施者得福受者不得飲故論云是菩薩或時樂捨一  
切須食與食須飲與飲若以酒施應生是念今是行檀  
時隨所須與後當方便教使離酒得念智慧令不放逸

何以故檀波羅蜜法悉滿人願在家菩薩以酒施者是  
則無罪又梵網經云若自身手過酒器與人飲酒者五  
百世中無手何況自飲不得教一切人飲及一切衆生  
飲酒況自飲酒又優婆塞五戒相經云佛在支提國跋  
陀羅婆提邑是處有惡龍名菴羅婆提陀兇暴惡害人  
無人得到其處象馬無能近者乃至諸鳥不得過上秋  
穀熟時並皆破滅時有長老莎伽陀羅漢比丘遊行支  
提國漸到跋陀羅波提邑過是夜已晨朝著衣持鉢入

村乞食時間此邑有惡龍亢暴害人鳥獸及破滅秋穀  
聞已乞食到菴婆羅提龍住處衆鳥樹下敷座具大坐  
龍聞衣氣即發瞋恚從身出煙長老莎伽陀即入三昧  
以神通力身亦出煙龍倍瞋恚身上出火莎伽陀復入  
火光三昧身亦出火龍復雨電莎伽陀即變電作釋俱  
餅髓餅等龍復放霹靂莎伽陀變作種種歡喜九龍復  
雨弓箭刀稍莎伽陀即變作優鉢羅華波頭摩華等龍  
復雨毒蛇蜈蚣土虺蚰蜒莎伽陀即變作優鉢羅華瓔

珞蘂葡萄瓔珞等如是等龍所有勢力盡現向莎伽陀  
皆不能勝即失威力光明莎伽陀知龍力盡不能復動  
即變作細身從龍兩耳入從兩眼出已從鼻入從鼻入  
已從口中出在龍頭上往來經行不傷龍身爾時龍見  
如是事已心即大驚怖毛豎合掌向莎伽陀言我歸依  
汝莎伽陀答言汝莫歸依我當歸依我師佛龍答言我  
從今歸依三寶知我盡形作佛優婆塞是龍受三自歸  
作佛弟子已更不復作如先兇惡事諸人及鳥獸皆得

到所秋穀不傷名聲流布諸國皆知長老莎伽陀能降  
伏惡龍折令善因莎伽陀名聲流布諸人皆作食傳爭  
請之是中有一貧女人信敬請得莎伽陀是女為辦酥  
乳糜食之女人念思惟是沙門噉是酥乳糜或當冷發  
便取似水色酒持與莎伽陀莎伽陀不看便飲飲已為  
說法便去過向寺中爾時酒勢便發近寺門邊不覺倒  
地僧伽梨衣漉水囊鉢杖等各在一處身在一處醉無  
所覺佛與阿難行到是處見是比丘知而故問阿難此

是何人答言世尊此是長老莎伽陀佛即語阿難是處  
為我敷座辦水集僧阿難受教敷座辦水集僧已白佛  
言僧已集佛自知時佛即洗足坐已問諸比丘汝等曾  
見聞有龍名菴婆羅提陀允暴惡害先無有人到其住  
處乃至鳥獸無能到上秋穀熟時破滅諸穀莎伽陀能  
折伏令善鳥獸得到泉上是中有見聞者言見聞此事  
佛語諸比丘於汝意云何此善男子莎伽陀今能折伏  
蝦蟇不答言不能佛言聖人飲酒尚如是失何況凡夫

如是過罪皆由飲酒今從自後若言我是佛弟子者不得飲酒乃至小草頭一滴亦不得飲佛種種呵責飲酒過失已依律因此比丘便制不飲酒戒○問曰未審天上有酒味不答曰無實麴米所造之酒但有業化所作酒也故正法念經云彼夜摩天男共天女衆入池遊戲同飲天酒離於醉過現樂功德味觸色香皆悉具足其中諸天有以珠噐而飲酒者受用酥酤之食色觸香味皆悉具足彼如是念此水為酒令我得飲即於念時皆



是天酒離於醉過天既飲之增長勝樂善業力故心生  
歡喜然彼諸天自業力故如是受樂有鳥名為常樂見  
彼諸天在歡喜河而飲酒故為說偈言

沒入放逸海 貪著諸境界 此酒能迷心

何用復飲酒 為境界火燒 不知作不作

園林主貪心 何用復飲酒

彼常樂鳥見樂飲酒天在河飲酒為調伏故如是說偈  
又正法念經閻羅王責數罪人說偈云

酒能亂人心 令人如羊等 不知作不作

如是應捨酒 若酒醉之人 如死人無異

若欲常不死 彼人應捨酒 酒是諸過處

恒常不饒益 一切惡道階 黑闇所在處

飲酒到地獄 亦到餓鬼處 行於畜生業

是酒過所誑 酒為毒中毒 地獄中地獄

病中之大病 是智者所說 若人飲酒者

無因緣歡喜 無因緣而瞋 無因緣作惡

於佛所生癡 壞世出世事 燒解脫如火

所謂酒一法 若人能捨酒 正行於法戒

彼到第一處 無死無生處

問曰無病飲得罪有病開飲不答曰依四分律實病餘藥治不差以酒為藥者不犯問曰開服幾許答曰依文殊師利問經云若合藥醫師所說多藥相和少酒多藥得用又舍利弗問經云舍利弗白佛言云何世尊說遮道法不得飲酒如葶藶子是名破戒開放逸門云何迦

蘭陀竹園精舍有一比丘疾病經年危篤將死時優波離問言汝須何藥我為汝覓天上人間乃至十方是所應用我皆為取答曰我所須藥是違毗尼故我不覓以至於此寧盡身命無容犯律優波離言汝藥是何答曰須酒五升優波離曰若為病開如來所許為乞得酒服已消差差已懷慚猶謂犯律往至佛所慙懃悔過佛為說法聞已歡喜得羅漢道佛言酒有多失開放逸門飲如葶藶子犯罪已積若消病苦非先所斷

述曰不得見前文開籠通總飲必須實病重困臨終先用餘藥治皆不差要須酒和得差者依前方開比見無識之人身力强壯日別馳走不依衆儀少有微患便長情貪不護道業妄引經律云佛開種種湯藥名衣上服施佛及僧因公傍私詭誑道俗是故智人守戒如命不敢犯之是故薩遮尼乾子經偈云

酒為放逸根 不飲閉惡道 寧捨百千身

不毀犯法教 寧使身乾枯 終不飲此酒

假使毀犯戒 壽命滿百年 不如護禁戒

即時身摩滅 決定能使差 我猶故不飲

況今不定知 為差為不差 作是決定心

心生大歡喜 即獲見真諦 所患即消除

當知衆生所有病者皆由貪瞋我慢為因從因有果得此苦報非由不得藥酒病不得差故涅槃經云一切衆生有四毒箭則為病因何等為四一貪欲二瞋恚三愚癡四憍慢若有病因則有病生所謂愛熱肺病上氣吐

逆膚體瘡瘡其心悶亂下痢噦噎小便淋瀝眼耳疼痛  
腹背脹滿顛狂乾消鬼魅所著如是種種身心諸病若  
識病本斷惡修善三世苦報永除不受若不觀理縱用  
天下藥酒所治其病轉增難可得差又毗尼母經云尊  
者彌沙塞說曰莎提比丘少小因酒長養身命後出家  
已不得酒故四大不調諸比丘白佛佛言病者聽甕上  
嗅之若差不聽嗅不差者聽用酒洗身若復不差聽用  
酒和麵作餅食之若復不差聽酒中自漬又新婆沙論

云如契經尊者舍利子於憍薩羅國住一林中時有活  
命出家外道亦住彼林隣近尊者去林不遠諸村邑中  
有時廣設四月節會時彼外道巡諸村邑飽食猪肉恣  
情飲酒竊持殘者還至林中見舍利子坐一樹下酒所  
昏故起輕憊心我今與彼雖俱出家我獨富樂而彼貧  
苦尋趣尊者作是頌曰

我已飽酒肉 復竊持餘來 地上草木山  
皆視如金聚



時舍利子聞已念言此死外道都無慚愧乃能無賴說  
此伽陀我今亦應對彼說頌作是念已即說頌言

我常飽無相 恒住空定門 地上草木山

皆視如唾處

今此頌中尊者舍利子作師子吼說三解脫門謂於初  
句說無相解脫門於第二句說空解脫門於後二句說  
無願解脫門

食肉部

述曰此之一教亦有權實言權教者據毗尼律中世尊  
初成道為度麤惡凡夫未堪說細且於漸教之中說三  
種淨肉離見聞疑不為已殺鳥殘自死者開聽食之先  
麤後細漸令離過是別時之意不了之說若據實教始  
從得道至涅槃夜大聖慇懃始終不開又涅槃經云一  
切衆生聞其肉氣皆悉恐怖生畏死想水陸空行有命  
之類悉捨之走咸言此人是我等怨是故菩薩不習食  
肉為度衆生示現食肉雖現食之其實不食但諸衆生

有執見者不解如來方便說意便即偏執毗尼局教言  
佛聽食三種淨肉亦謗我言如來自食彼愚癡人成大  
罪障長夜墮於無利益處亦不得見現在未來賢聖弟  
子況當得見諸佛如來大慧諸聲聞人等常所應食米  
麵油蜜等能生淨命非法貯畜非法受取我說不淨尚  
不聽食何況惠食肉血不淨耶非直食肉壞善障道乃  
至邪命諂曲以求自活亦是障道又文殊師利問經云  
若為已殺不得噉若肉如林木已自腐爛欲食得食若

欲噉肉者當說此呪

多經吽

此言如是

阿捺摩阿捺摩

此言無我

阿視婆多阿視婆

多

此言無壽命無壽命

那舍那舍

此言失失

陀呵陀呵

此言燒燒

婆弗婆弗

此言破

僧柯慄多弭

此言有為

莎呵

此言除殺去

此呪三說乃得噉肉飯亦不食何以故若無思惟飯不

應食何況當噉肉佛告文殊師利以衆生無慈悲力懷

殺害意為此因緣故斷食肉若能不懷害心大慈悲心

為教化一切衆生故無有過罪○問曰酒是和神之藥

肉為充飢之饍古今同味今獨何見鄙而不食若使佛  
教清禁居喪禮制即如對於嚴君勅賜俗食豈關僧過  
拒而不食耶答曰貪財喜色貞夫所鄙好膳嗜美庶士  
所惡割情從道前賢所歎抑慾崇德往哲同嗟況肉由  
殺命酒能亂神不食是理寧可為非縱逢上抑終須嚴  
斷雖違君命還順佛心問曰肉由害命斷之且然酒不  
損生何為頓制若使無損計罪無過言非飲漿食飯亦  
應得罪而實不爾酒何偏斷答曰結戒隨事得罪據心

肉體因害食之即罪酒性非損過由弊神餘處生過過  
生由酒斷酒即除所以遮制不同非謂酒體是罪問曰  
罪有遮性酒體生罪今有耐酒之人能飲不醉又不弊  
神亦不生罪此人飲酒應不得罪斯則能飲無過不能  
招咎何關斷酒以成戒善可謂能飲耐酒當名持戒少  
飲即醉是大罪人答曰制戒防非本為生善戒是上善  
身口無違緣中止息遮性兩斷乃名戒善今耐酒之人  
既不亂神未破餘戒實理非罪正以飲生罪因外違遮

教緣中生犯仍名有罪以乖不飲猶非持戒第一據實  
有損者依經食肉之人有十種過失第一明一切衆生  
無始已來皆是已親不合食肉故入楞伽經云我觀衆  
生輪迴五道同在生死共相生育遞為父母兄弟姊妹  
若男若女中表內外六親眷屬或生餘道善道惡道常  
為眷屬以是因緣我觀衆生更相啖肉無非親者由食  
肉味遞互相啖常生害心增長苦業流轉生死不得出  
離佛說是時諸惡羅刹聞佛所說悉捨惡心止不食肉

通相勸發菩提之心護衆生命過自護身離一切惡諸  
肉不食悲泣流淚白言世尊我聞佛說諦觀六道我所  
啖肉皆是我親乃知食肉衆生是我大怨斷大慈種長  
不善業是大苦本我從今日斷不食肉及我眷屬亦不  
聽食如來弟子有不食者我當晝夜親近擁護若食肉  
者我當與作大不饒益大慧羅刹惡鬼常食肉者聞我  
所說尚發慈心捨肉不食況我弟子行善法者當聽食  
肉若食肉者當知即是衆生大怨斷我聖種大慧若我



弟子聞我所說不諦觀察而食肉者當知即是旃陀羅  
種非我弟子我非其師第二明食肉衆生見者皆悉驚  
怖故不應食如彼經說食肉之人衆生聞氣悉皆驚怖  
逃走遠離是故菩薩修如實行為化衆生不應食肉譬  
如旃陀羅獵師屠兒捕魚鳥人一切行處衆生遙見作  
如是念我今定死而此來者是大惡人不識罪福斷衆  
生命求現前利今來至此為覓我等今我等身悉皆有  
肉是故今來我等定死大慧由人食肉能令衆生見者

皆生如是驚怖大慧一切虛空地中衆生見食肉者皆  
生恐怖而起疑念我於今者為死為活如是惡人不修  
慈心亦如豺狼遊行世間常覓肉食如牛噉草蜣螂逐  
糞不知飽足我身是肉正是其食不應逢見即捨逃走  
離之遠去如人畏懼羅刹無異第三明食肉之人壞他  
信心是故不應食肉如彼經云若食肉者衆生即失一  
切信心便言世間無可信者斷於信根是故大慧菩薩  
為護衆生信心一切諸肉悉不應食何以故世間有人

見食肉故謗毀三寶作如是言於佛法中何處當有真  
實沙門婆羅門修梵行者捨於聖人本所應食食於衆  
生猶如羅刹斷我法輪絕滅聖種一切皆由食肉者過  
是故大慧我弟子者為護惡人毀謗三寶乃至不應生  
念肉想何況食噉也第四明慈心少欲行人不應食肉  
如彼經說菩薩為求出離生死應當專念慈悲之行少  
欲知足厭世間苦速求解脫若捨憤鬧就於空閑住屍  
陀林阿蘭若處塚間樹下獨坐思惟觀諸世間無一可

樂妻子眷屬如枷鎖想宮殿臺觀如牢獄想觀諸珍寶  
如糞聚想見諸飲食如膿血想受諸飲食如塗癰瘡想  
趣得存命繫念聖道不為貪味酒肉葱韭蒜薤臭味悉  
捨不食若如是者是真修行堪受一切人天供養若於  
世間不生厭離貪著諸味酒肉葷辛皆便噉食不應受  
於世間信施也第五明食肉之人皆是過去曾作惡羅  
刹由習氣故今故貪肉是故不應食肉也如彼經說有  
諸衆生過去曾修無量因緣有微善根得聞我法信心

出家在我法中過去曾作羅刹眷屬虎狼師子猫狸中  
生雖在我法食肉餘習見食肉者歡喜親近入諸城邑  
聚落塔寺飲酒噉肉以為歡樂諸天下觀猶如羅刹爭  
噉死屍等無有異而不自知已失我衆成羅刹眷屬雖  
服袈裟剃除鬚髮有命看見心生恐怖如畏羅刹此明  
食肉皆是過去曾作羅刹師子虎狼猫狸中來故應裁  
斷也第六明食肉之人學世呪術尚不得成況出世法  
何由可證是故行者不應食肉如彼經說世間邪見諸

呪術師若其食肉呪術不成為成邪術尚不食肉況我  
弟子為求如來無上聖道出世解脫修大慈悲精勤苦  
行猶恐不得何處當有如是解脫為彼癡人食肉而得  
其報是故大慧我諸弟子為求出世解脫樂故不應食  
肉也第七明衆生皆受身命與已無別是故行者不應  
食肉如彼經說食肉能起色力貪味人多貪著應當諦  
觀一切世間有身命者各自寶重畏於死苦護惜已身  
人畜無別寧當樂存芥野干身不能捨命受諸天樂何

以故畏死苦故以是觀察死為大苦是可畏法自身畏  
死云何當得而食他肉是故大慧欲食肉者先自念身  
次觀衆生不應食肉也第八明食肉之人諸天賢聖皆  
悉遠離惡神恐怖是故行者不應食肉如彼經說夫食  
肉者諸天遠離何況聖人是故菩薩為見聖人當修慈  
悲不應食肉大慧食肉之人睡眠亦苦起時亦苦若於  
夢中見種種惡驚怖毛豎心常不安無慈心故乏諸善  
力若其獨在空閑之處多為非人而伺其便虎狼師子

亦來伺求欲食其肉心常驚怖不得安隱也第九明食肉之人淨者尚不應食況不淨肉是故行者不應食肉如彼經說我說凡夫為求淨命噉於淨食尚應生心如子肉想何況聽食非聖人食聖人離著以肉能生無量諸過故失於出世一切功德云何言我聽諸弟子食諸肉血不淨等味言我愚者是則謗我故內律云食生肉血等得偷蘭遮罪第十明食肉之人死則還生惡羅刹等中是故行者不應食肉如彼經說食肉衆生依於過



去食肉重故多生羅刹師子虎狼豺豹猫狸鷄梟鵬鷲  
鷹鷂等中有命之類各自護身不令得便受飢餓苦常  
生惡心念食他肉命終復墮惡道受生人身難得何況  
當有得涅槃道當知食肉有如是等無量諸過是故行  
者不食肉者即如無量功德之聚也又鶡掘魔經云文  
殊師利白佛言世尊因如來藏故諸佛不食肉耶佛言  
如是一切衆生無始生死生生輪轉無非父母兄弟姊  
妹猶如伎兒變易無常自肉他肉則是一肉是故諸佛

悉不食肉復告文殊一切衆生界我界即是一界所肉  
之肉即是一肉是故諸佛悉不食肉佛告文殊若自死  
牛牛主持皮用作革屣施持戒人為應受不若不受者  
是比丘法若受者非悲然不破戒以從展轉離殺因緣  
故也又此經說衆生身肉有八十萬戶蟲若斷一衆生  
命即斷八十萬戶蟲命若炙若煮若淹若暴皆有小蟲  
飛蛾蠅蛆而附近之如是展轉傍殺無量生命雖不自  
手而殺然屠者不敢自食皆為食肉之人殺之故知食

肉之人即兼有殺業之罪或有出家僧尼躬在伽藍共諸白衣公然聚會飲酒食肉葷辛雜穢汙染伽藍不愧尊顏如斯渾雜豈勝外道又尼羅浮陀地獄經云身如段肉無有識知此是何人皆由飲酒出家僧尼豈不深信經教心生重愧自棄正法同於外道若噉衆生父肉衆生亦噉父肉若噉衆生母肉衆生亦噉母肉如是姊兄弟妹男女六親並有相對怨怨相酬未可得脫又沙彌尼戒經云不得殺生慈愍羣生如父母念子加哀孺

動猶如赤子何謂不殺護身口意身不殺人畜喘息之類手亦不為亦不教人見殺不食聞殺不食疑殺不食為我殺不食口不說言當殺當害報怨亦不得言死快殺快某肉肥某肉瘦某肉多好某肉少惡意亦不念哀念衆生如己骨髓如父如母如子如身等無差別普等一心常志大乘又賢愚經云佛告波斯匿王曰過去久遠阿僧祇劫此閻浮提有一大國名波羅柰於時國王名波羅摩達王將四種兵入山獵戲王到澤上馳逐禽

獸單隻一乘獨到深林王時疲極下馬小休爾時林中有特師子懷欲心盛行求其偶不能得值於林間見王獨坐姪意轉盛思欲從王近到其邊舉尾背住王知其意而自思惟此是猛獸力能殺我若不從意儻見危害王以怖故即從師子成欲事已師子還去諸兵羣從已復來到王與人衆即還宮城爾時師子從是懷胎日月滿足便生一子形盡似人唯足斑斕師子意識知是王有便銜擔來著於王前王亦思憶知是已兒即收取養

以足斑駁字為斑足養之漸大雄才志猛父王崩亡斑足繼治時斑足王有二夫人一是王種二是婆羅門種斑足出遊勸二夫人隨我後往誰先到者當與一日極相娛樂其隨後者吾不見之王去之後其二夫人極自莊飾嚴駕俱往到於道中見於天祠梵志種者下車作禮禮已後到王從本言而不前之於是夫人瞋怨天神由禮汝故使王見薄若有天力何不護我後壞天祠令平如地守天祠神悲惱至宮欲傷王宮天神遮不聽入

有一仙人住止山中王恒供養日日食時飛來入宮不食餽饍粗食麤供偶值一日仙人不來天神知之化作其形坐於常處不肯就食欲得魚肉即如語辦食已還去明舊仙來為設肉食仙人瞋王王言大仙先日勅作今何不食仙人語言昨日有患一日不來是誰語汝但相輕試令王是後十二年中恒食人肉作是語竟飛還山中是後厨監忘不辦肉臨時無計出外求肉見死小兒肥白在地念日稱急即却頭足擔至厨中加諸美藥

作食與王王得食之覺美倍常即問厨監由來食肉未  
有斯美此是何肉厨監惶怖腹拍王前若王原罪乃敢  
實說王答之言但實說之不問汝罪厨監白王具述前  
報王言此肉甚美自今已後如是求辦厨監白王前者  
偶值死兒更求叵得王又語言汝但密求設令有覺斷  
處由我厨監受教夜恒密捕得便殺之日日供王於時  
城中人民之類各各行哭云亡失兒展轉相問何由乃  
爾諸臣聚議當試微伺即於街里處處安人見王厨監



拽他小兒伺捕得之縛將詣王具以前事白王王言是  
我所教諸臣懷恨各自外議王便是賊食我等子噉人  
之王云何共治當共除之去此禍害一切同心咸共齊  
謀一時同合即圍其王當取殺之王見兵集驚怖問言  
汝等何故而圍逼我諸臣答言夫為王者養民為事方  
駢子厨殺人為食不任苦酷故欲殺王王語諸臣自今  
已後更不復為唯見恕放當自改勵諸臣語曰終不相  
放不須多云時王聞已自知必死即語諸臣雖當殺我

小緩須臾聽我一言即自立誓我身由來所修善行為  
王正治供養仙人合集衆德迴令今日我得變成飛行  
羅刹其語已訖尋語而成即飛虛空告諸臣曰汝等合  
力欲強殺我賴我大幸復能自拔自今已後汝等好忍  
所愛妻兒我次第食語訖飛去止山林間飛行搏人擔  
以為食人民之類恐怖藏避如是之後殺噉多人諸羅  
刹輩附為翼從徒衆漸多所害轉廣後諸羅刹白斑足  
王我等奉事為王願為一會王即許之當取諸王令滿

五百與汝為會許之已訖一一往取閉著深山已得四  
百九十九王殘少一人後捕得須陀素彌王大有高德  
從羅刹王乞得七日假假滿還來須陀素彌廣為說法  
分別殺罪及其惡報復說慈心不殺之福斑足歡喜敬  
戴為禮承用其教無復害心即放諸王各還本國須陀  
素彌即佐兵衆還將斑足安置本國前仙人誓十二年  
滿自是已後更不噉人遂還霸王治民如舊爾時須陀  
素彌王者今我身是斑足王者今鶩掘摩羅是爾時諸

人十二年中為斑足王所食噉者今此諸人為鴛掘摩  
羅所殺者是此諸人等世世常為鴛掘所殺我亦世  
降之以善鴛掘摩者拍鬘比丘是時波斯匿王復白佛  
言拍鬘比丘殺此多人食已得道當受報不佛告大王  
行必有報今此比丘在於房中地獄之火從毛孔出極  
患苦痛酸切巨言佛勅一比丘汝持戶排往拍鬘房刺  
戶孔中比丘即往奉教為之排入戶內尋自融消比丘  
驚愕還來白佛佛告比丘行報如是王及衆會莫不信

解頌曰

財色與酒

名為三惑

臣耽喪家

君重亡國

肉障大慈

辛遮淨德

懷道君子

斯穢不欲

法苑珠林卷一百十二

校讞

第十六紙

六行後二之  
二南藏作三

第十七紙

南藏作材

音釋

宜果

罝子邪切罝罝兔之網罝尤切

署

網公  
也戶  
切

顛顛

頤頤  
秦昨  
醉焦  
切切

瘠頹  
貌頹憂

點

胡也八切

稍

色角切  
牙屬

蝕

蝮蛇也切

詭

詐居消切

瘡

瘡似入切痛

噦

嘔於月切

清

子智切

鷄泉

鷄堯切赤脂切梟鷄梟鷄古

也

蠕

而究切  
蟲動貌

駁

不純也

愕

驚各切





欽定四庫全書

法苑珠林卷一百十三

唐 釋道世 撰

酒肉篇第九十三之餘

感應緣

略引一  
十四驗

魏洛子淵

晉沙門法遇

晉新野庾紹之

宋蔣小德

宋沙門竺惠熾

吳諸葛恪

周武帝

隋趙文若

唐孫迴璞

唐頓丘李氏

唐叅軍鄭師辯

唐京兆韋知十

唐雍州謝氏

唐洛州任五娘

魏孝昌時有虎賁洛子淵者自云洛陽人孝昌中戍於  
彭城其同營人樊元寶得假還京師子淵附書一封令  
達云宅在靈臺南近洛水卿但至彼家人自出相看元  
寶如其言至臺南了無人家徙倚欲去忽見一老公問  
云從何而來彷徨於此元寶具向道之老公云吾兒也

取書引元寶入遂見館閣崇寬屋宇佳麗既坐令婢取  
酒須臾婢抱一死小兒而過元寶初甚怪之俄而酒至  
酒色甚紅香美異常兼設珍羞海陸備有飲訖告退老  
公送元寶出云後會難期以為悽恨別甚慇懃老公還  
入元寶不復見其門巷但見高崖對水淥波東傾唯見  
一童子可年十五新溺死鼻中血出方知所飲酒乃是  
血也及還彭城子淵已失矣元寶與子淵同戍三年不  
知是洛水之神也

出洛陽  
寺記錄

晉有荊州長沙寺僧釋法遇不知何人弱年好學篤志  
墳典事道安為師解悟非常乃避地東下止江陵長沙  
寺講說衆經受業者四百餘人時有一僧飲酒廢夕燒  
香遇但止罰而不遣安公遙聞之以竹筒盛一荊子手  
自緘封題以寄遇遇開封見杖即曰此由飲酒也我訓  
領不勤遠貽憂賜即命維那鳴椎集衆以杖筒置香橙  
上行香畢遇乃起出衆前向筒致敬於是伏地令維那  
行杖三下內杖筒中垂淚自責時境內道俗莫不歎息

因之學徒勵業甚衆既而與慧遠書曰吾人微暗短不能率衆和尚雖隔在異域猶遠垂憂念吾罪深矣後卒於江陵春秋六十矣

右此一驗出  
梁高僧傳

晉新野庾紹之小字道覆晉湘東太守與南陽宋協中表昆弟情好綢繆紹元興末病卒義熙中忽見形詣協形貌衣服具如平生而兩脚著械既至脫械置地而坐協問何由得顧答云暫蒙假歸與卿親好故相過也協問鬼神之事紹輒漫略不甚諧對唯云宜勤精進不可

殺生若不能都斷可勿宰牛食肉之時無噉物心協云  
五藏與肉乃復異耶答曰心者善神之宅也其罪尤重  
具問親戚因談世事末復求酒協時時餌茱萸酒因為  
設之酒至對杯不飲云有茱萸氣協曰為惡之耶答云  
下官皆畏之非獨我也紹為人語聲高壯此言論時不  
異恒日有頃協兒遠之來紹聞履聲極有懼色謂協曰  
生氣見陵不復得住與卿三年別耳因貫械而起出戶  
便滅協後為正員郎果三年而卒

宋蔣小德江陵人也為丘州刺史朱循時為聽事監師少而信向勤謹過人循大喜之每有法事輒令典知其務大明末年得病而死夜三更將殮便蘇活言有使者稱王命召之小德隨去既至王曰君精勤小心虔奉大法帝勅精旨以君專至宜速生善地而君算猶長故令吾特相召也君今日將受天中快樂欣然小德嘉諾王曰君可且還家所欲屬寄及作功德可速之七日復來也小德受言而歸路由一處有小屋殊陋弊逢新寺難



公於此屋前既素識具相問訊難云貧道自出家來未嘗飲酒旦就蘭公蘭公苦見勸逼飲一升許被王召用此故也貧道若不坐此當得生天今乃居此弊宇三年之後方得上耳小德至家欲驗其言即夕遽遣人叅訊難公果以此日於蘭公處睡卧至夕而亡小德既愈七日内大設福供至期奄然而卒朱循即免家丘戶蘭難二僧並居新寺難道行尤精不同餘僧

宋沙門竺慧熾新野人住在江陵四層寺永初二年卒

弟子為設七日會其日將夕燒香竟道賢沙門因往視  
熾弟子至房前忽曖曖若人形詳視乃慧熾也容貌衣  
服不異生時謂賢君旦食肉美不賢曰美熾曰我坐食  
肉今生餓狗地獄道賢懼驚未及得答熾復言汝若不  
信試看我背後乃迴背示賢見三黃狗形半似驢眼甚  
赤光照戶內狀欲噬熾而復止賢駭怖悶絕良久乃蘇

具說其事

右此三驗  
出冥祥記

吳幼帝即位諸葛恪輔政孫峻為侍中大將軍恪強愎

傲物峻嶮側而好權鳳皇三年恪攻新城無功而還峻  
將以幼帝饗恪而殺之其日恪精神擾動通夕不寐張  
幼騰盾以峻謀告恪恪曰豎子其何能為不過因酒食  
行酖毒耳將親信人以藥酒自隨恪將入畜犬追銜其  
衣裾不得去者三恪顧拊犬頭曰怖那無苦也既入峻  
伏兵殺之峻後病夢為恪所擊狂言常稱見恪遂死

出宛

志

周武帝好食雞卵一食數枚有監膳儀同名拔虎常進

御食有寵隋文帝即位猶復監膳進食開皇中暴死而心尚暖家人不忍殯之三日乃穌能語先云舉我見至尊為武帝傳說既現而請文帝引問言曰始忽見人來喚隨至一處有大地穴所行之道徑入纔到穴口遙見西方有百騎來儀衛如王者俄至穴口乃周武帝也儀同拜之帝曰王喚汝證我事耳汝身無罪言訖即入宮中使者亦引儀同令見宮門引入庭前見武帝與王同坐而有加敬之容使者令儀同拜王王問曰汝為帝作

食前後進白團幾枚儀同不識白團顧左右左右教曰  
名雞卵為白團也儀同即答帝食白團實不記數王謂  
帝曰此人不犯當須出之帝慘然不樂而起忽見庭前  
有鐵牀并獄卒數十人皆牛頭人身帝已卧牀上獄卒  
用鐵梁壓之帝兩脇剖裂處雞子全出俄與牀齊可十  
餘斛乃盡王命數之訖牀及獄卒忽然不見帝又已在  
王坐帝謂儀同云為我相聞大隋天子昔與我共食倉  
庫玉帛亦我儲之我今身為滅佛法極受大苦可為吾

作功德也於是文帝勅天下人出一錢為追福焉臨外祖齊公親見問時節歸家具說

後隋大業中雍州長安縣有人姓趙名文若死經七日家人大斂將欲入棺乃縮一脚家人懼怕不敢入棺文若得活眷屬喜問所由文若報云當死之時見人引向閻羅王所問文若汝生存之時作何福業文若答王受持金剛般若經王歎云善哉此福第一汝雖福善且將示汝其受罪之處令一人引文若北行十步至一墻孔

令文若入孔隔壁有人引手從孔中捉文若頭引出極大辛苦得度牆外見大地獄鑊湯苦具罪人受苦不可具述乃有衆多猪羊雞魚鵝鴨之屬競來從文若債命文若云吾不食汝身何故見逼諸畜生等各報云汝往日時某年某月某處食我頭脚四支節節分張人各飲噉何故諱之文若見畜引實不敢拒逆唯知一心念佛深悔諸罪不出餘言求與諸畜得活之時具修福善報謝諸畜諸畜見為修福一時放却其引使人過將文若

至王所說見受罪處訖王付一椀釘令文若食之并用  
五釘釘文若頭頂及以手足然後放過文若得蘇具說  
此事極患頭痛及以手足久後修福痛漸得差從爾已  
來精勤誦持金剛般若不敢遺漏寸陰但見道俗親疎  
並勸受持般若後因使至一驛廳上暫時偃息似如欲  
睡于時夢見一青衣婦女急速而來請救乞命文若驚  
寤即喚驛長問云汝不為吾欲殺生不驛長答云實為  
公欲殺一小羊文若問云其羊作何色答云是青殺將



文若報云汝急放却吾與價直贖取放之良由般若威力冥資感應也

唐殿中侍御醫孫迴璞濟陰人也至貞觀十三年從王車駕幸九成宮三善谷與魏太師隣家嘗夜二更聞外有人喚孫侍醫聲璞起出看謂是太師之命既出見兩人謂璞曰官喚璞曰我不能步行即取璞馬乘之隨二人行乃覺天地如晝日光明璞怪訝而不敢言二人引璞出谷歷朝堂東又東北行六七里至首嵒谷遙見有

兩人持韓鳳方行語所引璞二人曰汝等錯我所得者是汝宜放彼人即放璞璞循路而還皆了了不異平生行處既至家繫馬見婢當戶眠喚之不應越度入戶見其身與婦並眠欲就之而不得但著南壁立大聲喚婦終不應屋內極明見壁角中有蜘蛛網中二蠅一大一小并見梁上所著藥物無不分明惟不得就牀自知是死甚憂悶恨不得共妻別倚立南壁久之微睡忽驚覺則身已卧牀上而屋中闇黑無所見喚婦令起焚火而

璞方大汗流起視蜘蛛網歷然不殊見馬亦大汗鳳方  
是夜暴死後至十七年璞奉勅馳驛往齊州療齊王祐  
疾還至洛州東孝義驛忽見一人來問曰君是孫迴璞  
不璞曰是君何問為答曰我是鬼耳魏太師有文書追  
君為記室因出文書示璞璞視之則鄭國公魏徵署也  
璞驚曰鄭公不死何為遣君送書鬼曰已死矣今為太  
陽都錄大監故令我召君迴璞引坐共食鬼甚喜謝璞  
璞請曰我奉勅使未還鄭公不宜追我還京奏事畢然

後聽命可乎鬼許之於是晝則同行夜則同宿遂至閩鄉鬼辭曰吾今先行度關待君璞度關出西門見鬼已在門外復同行至滋水鬼又與璞別曰待君奏事訖相見也君可勿食葷辛璞許諾既奏事畢而訪鄭公已薨校其薨日則孝義驛之前日也璞自以必死與家人訣別而請僧行道造像寫經可六七日夜夢前鬼來召引璞上高山山巔有大宮殿既入見衆君子迎謂曰此人修福不得留之可放去即推璞墮山於是驚悟遂至今

無恙矣迴璞自為臨說

唐冀州頓丘縣有老母姓李年可七十無子孤老唯有奴婢兩人家鎮沽酒漆灰少量分毫經紀貞觀年中因病氣斷死經兩日凶器已具但以心上少溫然始蘇活口云初有兩人並著赤衣門前召出之有上符遣追便即隨去行至一城有若州郭引到側院見一官人衣冠大袖憑案而坐左右甚多階下大有著枷鎖人防援如生官府者遣問老母何因行濫沽酒多取他物擬作法

華經已向十年何為不造老母具言酒使婢作量亦是  
婢經已付錢一千文與隱師即遣追婢須臾即至勘當  
元由婢即答四十放還遣問隱師報云是實乃語老母  
云放汝七日去經了當來得生善處遂爾得活復有人  
問勘校老母初死之時婢得惡忤久而始穌腹背青腫  
盖是四十杖迹隱禪師者本是客僧配寺頓丘年向六  
七十自從出家即頭陀乞食常一食齋未嘗暫輟遠近  
大德並皆敬慕老母死之夜隱師夢有赤衣人來問夢

中答云造經是實老母乃屈鄉閭眷屬及隱禪師行道產諸經生衆手寫經經了正當七日還見往者二人來前母云使人已來並皆好住聲絕即死隱師見存道俗欽敬

唐東宮右監門兵曹叅軍鄭師辯年未弱冠時暴病死三日而蘇自言初有數人見收將行入官府大門見有囚百餘人皆重行北面立凡為六行其前行者形狀肥白好衣服如貴人後行漸瘦惡或著枷鎖或但去巾帶偕行連袂嚴兵守之師辯至配入第三行東頭第三立

亦去巾帶連袂辯憂懼專心念佛忽見生平相識僧來  
入兵圍內兵莫之止因至辯所謂曰平生不修福今忽  
如何辯求哀請救僧曰吾今救汝得出可持戒耶辯許  
諾須臾吏引入諸囚至官前以次訊問至門外為授五  
戒用瓶水灌其額謂曰日西當活又以黃帛一枚與辯  
曰披此至家紩置淨處也仍示歸路辯披之而歸至家  
紩帛置牀角上既而目開身動家人驚散謂屍欲起  
唯母不去問曰汝活耶辯曰日西當活辯意時疑日



午問母母曰夜半方知死生相違晝夜相反既至日西  
能食而愈猶見帔在牀頭及辯能起帔形漸滅而尚有  
光七日乃盡辯遂持五戒後數年有友人勸食猪肉辯  
不得已食一嚮是夜夢已化為羅刹爪齒各長數尺捉  
生猪食之既曉覺口腥唾出血使人視滿口盡是凝血  
辯驚不敢復食肉又數年娶妻妻家逼食後乃無驗然  
而辯自五六年來鼻常有火瘡洪爛然身不能愈或恐  
以破戒之故也臨昔與辯同直東宮見其自說云爾

右此

五驗出  
冥報記

唐右金吾兵曹京兆韋知十至永徽中煮一羊脚半日  
猶生知十怒家人曰用柴十倍於常不知何意如此更  
命重煮還復如故乃命剖之其中遂得一銅像長徑寸  
焉光明照灼相好成就其家一生不敢食酒肉中山郎  
餘令親聞說之

唐雍州萬年縣閭村即灊渭之間也有婦姓謝適同縣  
元氏有女適迴龍村人來阿照謝氏永徽末亡龍朔元

年八月託夢於來氏女曰我為生時酤酒小作升方取價太多量酒復少今坐此罪於北山下人家為牛近被賣與法界寺夏侯師家今將我向城南耕稻田非常辛苦及寤其女涕泣為阿照言之至二年正月有法界寺尼至阿照村女乃問尼尼報云有夏侯師是實女即就寺訪之云近於北山下買得一牛見在城南耕地其女涕泣求請寺尼乃遣人送其女就之此牛平常唯一人禁制若遇餘人必陸梁舐觸見其女至乃舐其遍體又

流淚焉女即憑夏侯師贖之乃隨其女去今現在阿照家養飼女常呼為阿娘承奉不闕京師王侯妃媵多令召視競施錢帛

唐龍朔元年洛州景福寺比丘尼修行房中有侍童任五娘死後修行為五娘立靈經月餘日其姊及弟於夜中忽聞靈座上呻吟其弟初甚恐懼後乃問之答曰我生時於寺上食肉坐此大苦痛我體上有瘡恐污牀席汝可多將灰置牀上也弟依其言置灰後看牀上大有

膿血又語弟曰姊患不能縫衣汝大藍縷宜將布來我  
為汝作衫及鞵弟置布於靈牀上經宿即成又語其姊  
曰兒小時患染遂殺一螳螂取汁塗瘡得差今入刀林  
地獄肉中現有折刀七枚願姊慈流為作功德救助知  
姊煎迫交不濟辦但隨身衣服無益死者今並未壞請  
以用之姊未報問乃曰兒自取去良久又曰衣服已來  
見在牀上其姊試往觀之乃所斂之服也遂送淨土寺  
寶獻師處憑寫金剛般若經每寫一卷了即報云已出

一刀凡寫七卷了乃云七刀並得出訖今蒙福助即往  
託生與姊及弟哭別而去吳興沈玄法說淨土寺僧智  
整所說亦同

右此三驗出  
冥報拾遺

依宣律師感應記云四天王等告宣師曰佛在世時放  
大光明佛告天人龍鬼神等我之正法滅後多有諸比  
丘執我小乘教迹不解毗尼意導我聽諸比丘食肉於  
是諸比丘等在僧伽藍內殺害衆生猶如獵師屠肆之  
處復有比丘純著繒帛遊行婬女酒肆之舍不習三藏

不持禁戒痛哉苦哉諸惡比丘謗讟我教舌何不落告  
諸比丘我於無量劫來捨頭目髓腦或於饑饉世作大  
肉身施彼餓者或內外財施未曾慙惜從初發心乃至  
成佛宣教弟子噉衆生肉耶我既涅槃諸惡比丘次補  
我處為天人師開導衆生令得道果豈有天人之師口  
噉衆生肉耶我初成道時雖開毗尼中聽食三種淨肉  
亦非四生之類是諸禪定之肉是不思議肉非汝所知  
何故謗讟我教我於涅槃楞伽經中一切生命雜肉皆

已斷訖不聽持戒之人食諸衆生身肉若有惡比丘導  
毗尼教中聽食魚肉聽著蠶衣者此是魔說我成道已  
來至於涅槃唯服麤布白氎三衣未著繒帛何為謗我  
耶

穢濁篇第九十四

述意部

夫五陰虛假四大浮危受斯偽質事等畫瓶感此穢形  
又同坯器內外無實觸塗皆染加復閤浮穢質不淨充



軀常食酒肉恒食葷辛臭氣上衝諸天衣裂善神捨衛  
惡鬼交侵凡夫僧尼尚不樂近何況聖賢而不遠離兼  
復八苦煎逼九橫摧年念念遷流心心起滅徒染六情  
終墮三惡願各修身淨其心口也

五辛部

如楞伽經云佛言大慧如是一切葱韭薤蒜臭穢不淨  
能障聖道亦障世間人天淨處何況諸佛淨土果報酒  
亦如是又涅槃經云乃至食葱韭蒜薤亦皆如是當生

苦處穢汙不淨能障聖道亦障世間人天淨處何況諸  
佛淨土果報酒亦如是能障聖道能損善業能生諸過  
又雜阿舍經云不應食五辛何等為五一者木葱二者  
革葱三者蒜四者興渠五者蘭葱又梵網經云若佛子  
不得食五辛大蒜革葱慈蔥蘭葱興渠是五種不得食  
又五辛報應經云七衆等不得食肉葷辛讀誦經論得  
罪有病開在伽藍外白衣家服已滿四十九日香湯澡  
浴竟然後許讀誦經論不犯又僧祇十誦五分律等更

無餘治開病比丘服蒜聽七日在一邊小房內不得卧  
僧牀縛衆大小便處講堂處皆不得到又不得受請及  
僧中食不得就佛禮拜得在下風處遥禮七日滿已澡  
浴熏衣方得入衆若有患瘡醫教須香治者佛令先供  
養佛已然後許塗身還在屏處一同前法

出家性潔尚  
令作法如是

況穢俗凡人  
輒開食耶

### 噤氣部

如僧祇律云若在禪坊中噤者不得放恣大噤若噤來

時當忍以手掩鼻若不可忍者應手遮鼻而嚏勿涕唾  
汙比丘座若上座嚏者應言和南下座嚏默然又四分律  
云時世尊嚏諸比丘呪願言長壽時有居士嚏及禮拜  
比丘佛令比丘呪願言長壽又僧祇律云佛言若急下  
風來者當制若不可忍者當向下坐若得在前縱氣若  
氣來不可忍者當下道在下風放之又毗尼母經云氣  
有二種一者上氣二者下氣上氣欲出時莫當人張口  
令出要迴面向無人處張口令出若下氣欲出時不聽

衆中出要作方便出外至無人處令出然後來入衆莫使衆譏嫌汙賤入塔時不應放下氣安塔樹下大衆中皆不得令出氣師前大德上座前亦不得放下風出聲若腹中有病急者應出外莫令人生汙賤心

便利部

如優鉢祇王經云伽藍法界地漫大小行者五百身墮拔波地獄後經二十小劫常遣肘手抱此大小便處臭穢之地乃至黃泉又毗尼母經云諸比丘住處房前間

處小便汙地臭氣皆不可行佛聞之告諸比丘從今已去不聽諸比丘僧伽藍處處小行當聚一屏猥處若瓦瓶若木甬埋地中就中小行已以物蓋頭莫令有臭氣又毗尼母經云若上廁去時應先取籌草至戶前三彈指作聲若人非人令得覺知若無籌不得壁上拭不得廁板梁柱上拭不得用石不得用青草土塊軟木皮軟葉奇木皆不得用所應用者木竹葦作籌度量法極長者一櫟手短者四指已用者不得振令汙淨者不得著

淨籌中是名上廁法籌法上廁有二處一者起止處二者用水處用水處坐起褰衣一切如起止處無異廁戶前著淨瓶水復應著一小瓶若自有瓶者當自用若無瓶者用廁邊小瓶不得直用僧大瓶水令汙是名上廁用水法塔前衆僧前和尚阿闍梨前不得張口大洩唾著地若欲洩唾當屏猥處莫令人惡賤是名洩唾法又三千威儀云若不洗大小便比丘得突吉羅罪亦不得淨僧座上坐及禮三寶設禮無福德又至舍後上廁

有二十五事一欲大小便當行時不得道上為上座作禮二亦莫受人禮三往時當直低頭視地四已往當三彈指五已有人彈指不得逼六已上正住彈指乃踞七正踞中八不得一足前一足却九不得令身倚十斂衣不得使垂圍中十一不得大咽使面赤十二當直視前不得顧聽十三不得汙壁十四不得低頭視圍中十五不得視陰十六不得以手持陰十七不得草蓋地十八不得持草畫壁作字十九用水不得大費二十不得汙



湔二十一用水不得使前手著後手二十二用土當三  
過二十三當用澡豆二十四三過用水二十五設見水  
草土盡當語直日主者若自手取為善又僧祇律云大  
小行已不用水洗而受用僧座具牀縛得罪又十誦律  
云不洗大行處不得坐卧僧卧具上得罪又摩德勒伽  
論云不洗大小行處不得禮拜餘無水處若為非人所  
瞋水神所瞋或為服藥等開不犯又三千威儀經云不  
洗淨禮佛者設禮無功德也又雜譬喻經云有一比丘

不彈指來大小便潑汙中鬼面上魔鬼大恚欲殺沙門  
持戒魔鬼隨逐伺覓其短不能得便

既知此事上廁  
必須磬噓作聲

賢愚經云昔佛在世時舍衛城中有一貧人名曰尼提  
極貧下賤常客除糞佛知應度即將阿難往到其所正  
值尼提擔糞出城而欲棄之瓶破汙身遙見世尊深生  
慚愧不忍見佛佛到其所廣為說法即生信心欲得出  
家佛使阿難將至河中與水洗訖將詣祇洹佛為說法  
得須陀洹尋即出家得阿羅漢果國人及王聞其出家

皆生怨恨云何佛聽此人出家波斯匿王即往佛所欲  
破此事正值尼提在祇洹門大石上坐縫補故衣七百  
諸天香華供養王見歡喜請通白佛尼提比丘身沒石  
中出入自在通白已竟王到佛所先問此事向者比丘  
姓字何等佛告曰是王國中下賤之人除糞尼提王聞  
佛語謗心即除到尼提所執足作禮懺悔辭謝王白佛  
言尼提比丘宿作何業受此賤身佛告王曰昔迦葉佛  
入涅槃後有一比丘出家自在秉捉僧事身暫有患懶

起出入便利器中使一弟子擔往棄之然其弟子是須

陀洹以是因緣流浪生死恒為下賤五百世中為人除

糞由昔出家持戒功德今得值佛出家得道

以是義故不得房內

便利具招前罪數見俗人懈怠不能自運置穢器在房  
便利令他日別將棄未來定墮地獄縱得出獄猶作猪

狗蠅  
廁蟲也

又佛說除災患經云佛告阿難乃前世過去迦

葉佛時人壽二萬歲佛事終竟復捨壽命爾時有王者

名曰善頸供養舍利起七寶塔高一由延一切衆生焚

燈燒香香華繒綵供養禮事時有衆女欲供養塔便共

相率掃除塔地時有狗糞汙穢塔地有一女人手撮除  
棄復有一人見其以手除地狗糞便唾笑之曰汝手以  
汙不可復近彼女逆罵汝嫖姪物水洗我手便可復淨  
佛天人師敬意無已手除不淨已便澡手遶塔求願令  
掃塔地汙穢得除令我世世勞垢消滅清淨無穢時諸  
女人掃塔地者今此會中諸女人是爾時掃地願滅塵  
勞服甘露味爾時以手除狗糞女者今柰女是爾時發  
願不與汙穢會所生清淨以是福報不因胞胎臭穢之

處每因華生以其爾時發一惡聲罵言姪女故今受是  
姪女之名以值佛聞法得須陀洹又雜寶藏經云南天  
竺法家有一童女必使早起淨掃庭中門戶左右有長  
者女早起掃地會值如來於門前過見生歡喜注意看  
佛壽命旋促即終生天夫生天者法有三念自思惟言  
本是何身自知人身今生何處定知是天昔作何業來  
生於此由見佛歡喜善業得此果報感佛重恩來供養  
佛佛為說法得須陀洹又新婆沙論云昔怛叉尸羅國

有一女人至月光王捨千頭處禮無憂王所起靈廟見  
有狗糞在佛座前尋作是思此處清白如何狗糞汙穢  
其中以手捧除香泥塗飾善業力故今此女人遍體生  
香如栴檀樹口中常出青蓮華香若諸衆生由不護淨  
故因內煩惱感諸外穢故論頌言

世間諸穢草 能穢汙良田 如是諸貪穢

穢汙諸含識 世間諸穢草 能穢汙良田

如是諸瞋穢 穢汙諸含識 世間諸穢草

能穢汙良田

如是謂癡穢

穢汙諸舍識

又賢愚經云佛在世時羅閱城邊有一汪水汙泥不淨  
多諸糞穢國中人民以屎尿投中有一大蟲其形像蛇  
加有四足於其汪水東西馳走或沒或出經歷年載常  
處其中受苦無量爾時世尊將諸比丘至彼坑所問諸  
比丘汝識此蟲宿緣行不諸比丘咸言不知佛言毗婆  
尸佛時有衆賈客入海取寶大獲珍寶平安還到選寶  
上者用施衆僧規俟僧食僧受其實付授摩摩帝於後



僧食向盡從其求索不與衆僧苦索摩帝瞋恚而語之  
言汝曹噉戾此實屬我何緣乃索由其欺僧惡口罵故  
身壞命終墮阿鼻地獄身常宛轉沸戾之中九十一劫  
乃從獄出今墮此中自從七佛已來皆作其蟲至賢劫  
千佛各各皆爾又百緣經云佛在王舍城迦蘭陀竹林  
時尊者舍利弗大目犍連設欲食時先觀地獄畜生餓  
鬼然後方食目連見一餓鬼身如焦柱腹如太山咽如  
細針髮如錐刀纏刺其身諸支節間皆悉火出呻吟大

喚四向馳走求索屎尿以為飲食疲苦終日而不能得  
即問鬼言汝造何業受如是苦餓鬼答言有日之處不  
煩燈燭如來世尊今現在世汝可自問我今飢渴不能  
答汝爾時目連尋往佛所具問如來所造業行受如是  
苦具以上問爾時世尊告目連曰汝今善聽吾為汝說  
此賢劫中舍衛城中有一長者財寶無量不可稱計常  
令僕使壓甘蔗汁以輸大家有辟支佛甚患渴病良醫  
處藥教服甘蔗汁病乃可差時辟支佛往長者家乞甘

蔗汁時彼長者見來歡喜勅其婦富那奇我有急緣定  
欲出去汝今在後取甘蔗汁施辟支佛時婦答言汝但  
出去我後自與時夫出已取辟支佛鉢於其屏處小便  
鉢中以甘蔗汁蓋覆鉢上與辟支佛辟支受已尋知非  
是投棄於地空鉢還歸其後命終墮餓鬼中常為飢渴  
所見逼切以是業緣受如是苦佛告目連欲知爾時彼  
長者婦今富那奇餓鬼是佛說是時諸比丘等捨慳貪  
緣厭惡生死有得四沙門果者有發辟支佛心者有發

無上菩提心者爾時諸比丘聞佛所說歡喜奉行頌曰

噉他身血肉 貪毒無慈矜 養茲身穢質

蟲窩內消融 不護僧淨器 受此廁中蟲

後報入地獄 苦痛未知窮

感應緣

畏引  
三驗

宋釋慧果

齊釋弘明

唐謝弘敬妻許

宋京師瓦官寺有釋慧果婺州人少以蔬食苦行自業  
宋初遊京師止瓦官寺誦法華十地嘗於厠前見一鬼  
致敬於果云昔為衆僧作維那小不如法墮在噉糞鬼  
中法師德素高明又慈悲為意願助以拔濟之方也又  
云昔有錢三千文埋在柿樹根下願取以為福果即告  
衆掘取果得錢三千文為造法華一部并設齋後夢見  
此鬼云已得改生大勝昔日果以宋太始六年卒春秋  
七十有六

齊永明中會稽釋弘明者止雲門寺誦法華禮懺為業  
每旦水瓶自滿實諸天童子為給使也又感虎來入室  
伏牀前久之乃去又見小兒來聽經云昔是此寺沙彌  
為盜僧厨食今墮廁中聞上人讀經故力來聽願助方  
便冀免斯累明為說法領解方隱後山精來惱明乃捉  
取以腰繩繫之鬼謝遂放因之永絕

右二驗出  
梁高僧傳

唐吳王文學陳郡謝弘敬妻高陽許氏武德初年遇患  
死經四日而穌說云被二三十人拘至地獄未見官府


即聞喚雖不識面似是姑夫沈吉光語音許問云語聲似是沈丈何因無頭南間人呼姑姨夫皆為某姓丈也吉光即以手提其頭置於膊上而語許曰汝且在此間勿向西院待吾為汝造請即應得出遂於語處而住更不東西看其吉光栖遑似有經紀凡經再宿吉光始來語許云汝今此來王欲令汝作其女伎儻引汝見不須道解絃管如其不為所悉可引吾為證也少間有吏抱案引入王果問之解絃管不許云不解復云沈吉光具

知王問吉光答云不解王曰宜早放還不須留也于時  
吉光欲發遣即共執案人籌度不解其語執案人云娘  
子功德力雖強然為先有少罪隨便受却身業俱淨豈  
不快哉更別引入一大院其門極小亦大見有人受罪  
許甚驚懼乃求於主者曰生平修福何罪而至斯耶答  
曰娘子曾以不淨盞盛食與親須受此罪方可得去遂  
以銅汁灌口非常苦毒比穌時口內皆爛光即云可於  
此人處受一本經記取將歸受持勿怠自今已去保年



八十有餘許生曾未誦經蘇後遂誦得經一卷詢訪人間所未曾有今見受持讀誦不闕其經見在文多不載蘇活之後吉光尚存以後二年方始遇害凡諸親屬有欲死者三年以前並於地下預見許之從父弟仁則說之云爾

右此一驗  
出冥報記



法苑珠林卷一百十三